

आकाशवाणी जयपुर—अजमेर
प्रादेशिक समाचार

- राज्यपालां रो दो दिन रो सम्मेलन नई दिल्ली मांय सरू व्हयो—राष्ट्रपति द्रौपदी मुर्मू राज्यपालां ऊं राज्यां रा संवैधानिक मुखिया रा तौर ऊं तालमेल बधावण बाबत् कह्यो।
- प्रदेश मांय आज ई केई ठोड़ां जोरदार बिरखा—टोंक, सवाईमाधोपुर अर बारां जिलां मांय बिरखा ऊं केई गेला बंद व्ह्या।
- आयुष्मान भारत—प्रधानमंत्री जन आरोग्य योजना रा तैत ई साल जून महीना ताई 34 करोड़ ऊं बत्ता आयुष्मान कार्ड जारी करी ज्या।
- अंग दान करण वाळा पिरवारां रो आज राज्य स्तर माथे मान करी ज्यो—चिकित्सा मंत्री गजेन्द्र सिंह खींवसर कह्यो—राज्य मांय अंगदान रा बारा मांय जाग बधी।

000

राष्ट्रपति द्रौपदी मुर्मू आज राष्ट्रपति भवन मांय राज्यां रा राज्यपालां रा सम्मेलण रो उद्घाटन कीनो। ई मौके वे कह्यो के देश मांय तीन नुवा कानून लागू व्हेवण ऊं न्याय प्रणाली रो नुवो युग सरू व्हयो है। राष्ट्रपति कह्यो के लोकतांत्रिक व्यवस्था ने बेहतर तरीका ऊं चलावण सारू न्यारी—न्यारी केंद्रीय एजेंसियां बीचे तालमेल घणो जरूरी है। वे राज्यपालां ऊं संबंधित राज्य रा संवैधानिक मुखिया रा तौर ऊं ई तालमेल ने बधावो देवण बाबत कह्यो। राष्ट्रपति राज्यपालां ऊं विश्वविद्यालयां रा कुलाधिपति रा तौर ऊं शिक्षा री गुणवत्ता मांय

सुधार री प्रक्रिया मांय योगदान देवण बाबत् कह्यो । वे आब—ओ—हवा मांय बदलाव अर दुनिया मांय गर्मी मांय बधोतरी सरीखी चुनौतियां रो सामो करण सारू राज्यपालां ऊं 'एक पेड़ मां के नाम' अभियान ने जनता रा मोटा आंदोलन बणावण बाबत कह्यो । दो दिन रा ई सम्मेलन री सरूआत रे मौके उपराष्ट्रपति जगदीप धनखड़ ई राज्यपालां ऊं विकास रा बारा मांय संवैधानिक जिम्मेदारी पूरी करण री अपील कीनी । कार्यक्रम मांय प्रधानमंत्री नरेंद्र मोदी राज्यपालां ऊं केंद्र अर राज्य बीचे मजबूत कड़ी रो काम करण अर सरकारी योजनावां रो फायदो लेवण ऊं छूट्या लोगां अर सामाजिक संगठनां सागे बातचीत करण बाबत कह्यो ।

00000

प्रदेश मांय तेज बारिश रो सिलसिलो आज ई चालतो रह्यो अर केई ठोड़ां जोरदार मेह बरस्यो । शाहपुरा मांय चोखी बिरखा व्ही । हनुमानगढ़ मांय व्ही जोरदार बिरखा ऊं केई गेला बंद व्हे गया । जिला कलेक्टर कानाराम आज शहर रो दौरा कर र हालात रो जायजो लीनो । पेश है म्हाणा खबरनवीस री रपट—

.....

सवाईमाधोपुर मांय ई रुक—रुक र मेह व्हे रह्यो है । वठे काल ऊं व्हे रही बिरखा रे कारण नदी—नाळा उफण रह्या है । जिला रा गांवाई हलका मांय केई कच्चा घर ढस गया ।

जयपुर मांय व्हे रह्या छांटा—छिड़का ऊं मौसम सुहावणो व्हे ग्यो । बीकानेर रा गांवाई हलकां मांय ई आज व्ही जोरदार बरसात ऊं खेतां मांय पाणी भर ग्यो । बालोतरा मांय फुहारां पड़ी जदके फलौदी मांय 1 घंटा तांई जोरदार मेह बरस्यो । भीलवाड़ा मांय आज ई बिरखा व्ही । जिला कलेक्टर नमित मेहता वीडियो कॉन्फ्रेंसिंग रे जरिए अहलकारां री मीटिंग ले र बिरखा रे कारण उपजा हालात रो जायजो लीनो अर ज़रूरी हुकम दीना । भीलवाड़ा मांय व्हे रही बिरखा ने ध्यान राखता थकां स्कूली विद्यार्थियां सारू काल छुट्टी रो ऐलाण कर दियो ज्यो है । दौसा जिला मांय ई चोखो मेह बरस रह्यो है । लारला दो दिन ऊं व्हे रही बिरखा रे कारण राज्य रा घणखर जिलां मांय गर्मी अर उमस ऊं साता मिली है । **टोंक**, नागौर, अजमेर, पाली, **सांचौर** अर

जोधपुर समेत न्यारा-न्यारा जिलां मांय तेज बिरखा रा समाचार है। टोंक री जिला कलेक्टर डॉ.सौम्या झा पीपलू रो दौरा कर र लारली रात टूट्या बोरखंडीकला बंधा री मरम्मत रा काम रो जायजो लीनो। वे पीपलू ऊं बगड़ी रोड माथे मासी रपट परां आवाजाही रोकण रा हुकम दीना। ब्यावर रा जिला कलेक्टर उत्सव कौशल शहर रो दौरा कर र बिरखा रे कारण उपजा हालात रो जायजो लीनो। बारां रा जिला कलेक्टर रोहिताश्व सिंह तोमर पार्वती नदी हलका रा हनोतिया गांव रो दौरा कीनो। वे जनता ऊं नदी-नाळा अर पुलिया पार करती बगत सावचेती राखण री अपील कीनी। जैसलमेर, पोकरण, फलसूंड अर मोहनगढ़ मांय ई छांटो-छिड़को व्हयो। श्रीगंगानगर मांय बरसात रे कारण ढांढां रा बाड़ा मांय मकान री छत पड़ जावण ऊं ई रा मलबा हेटे बारह ढांढा दब ग्या, ज्यां मांय एक गाय अर एक भैंस री मौत व्हे गयी। मौसम विभाग आवता चार-पांच दिन प्रदेश मांय चौमासा री चौखी बिरखा व्हेवण रा आसार जताया है। विभाग रा जयपुर केंद्र रा निदेशक राधेश्याम शर्मा बतायो के आवता 48 घंटां मांय केई ठोड़ां घणी जोरदार बिरखा रा आसार है।

00000

केंद्रीय संचार ब्यूरो रा क्षेत्रीय कार्यालय सवाईमाधोपुर री ओर ऊं आज जड़ावता गांव मांय संपूर्णता अभियान अर राष्ट्रीय अंतरिक्ष दिवस रा बारा मांय जागरूकता कार्यक्रम राख्यी ज्यो। कार्यक्रम मांय भारतीय सूचना सेवा री अहलकार मनीषा मीणा 23 अगस्त ने मनाया जावण वाळा राष्ट्रीय अंतरिक्ष दिवस रा सिलसिला मांय अंतरिक्ष रा हलका मांय भारत री उपलब्धियां रा बारा मांय स्कूली विद्यार्थियां ने जाणकारी दीनी। वे संपूर्णता अभियान रा बारा मांय ई जाणकारी दीनी। कार्यक्रम रे दौरान सवाल पूछी ज्या अर जीतण वाळा ने ईनाम दे र नवाजी ज्या। ई मौके मौजूद लोगां ने साफ सफाई री शपथ ई दिरायी ज्यी।

0000

देश मांय आयुष्मान भारत-प्रधानमंत्री जन आरोग्य योजना रा तहत ई साल 30 जून ताई 34 करोड ऊं बत्ता आयुष्मान कार्ड जारी करी ज्या है। स्वास्थ्य अर परिवार कल्याण राज्य मंत्री प्रताप राव जाधव

लोकसभा मांय एक लिखित जवाब मांय आ जाणकारी दीनी। वे बतायो के आयुष्मान भारत—प्रधानमंत्री जन आरोग्य योजना राष्ट्रीय राजधानी क्षेत्र दिल्ली, पश्चिम बंगाल अर ओडिसा रे अलावा बाकी राज्यां अर केंद्र रा राज वाळा प्रदेशां मांय चलायी जा रही है। मंत्री कह्यो के योजना रा तहत अस्पताल मांय भर्ती व्ह्या सात करोड 37 लाख मरीजां रा ईलाज माथे एक लाख करोड़ रुपया ऊं बत्ती रकम खर्च करी ज्यी।

00000

चिकित्सा अर स्वास्थ्य मंत्री गजेन्द्र सिंह खींवसर अंगदान ने इंसानियत अर समाज री सब ऊं मोटी सेवा अर पुण्य रो काम बतायो है। खींवसर आज जयपुर मांय राख्यी ज्या अंगदान जागरूकता अभियान अर सम्मान समारोह मांय बोल रह्या हा। वे अंग दान करण वाळां रा पिरवार वाळां रो मान करता थकां कह्यो के अ परिवार अंगदान रा हलका मांय रोल मॉडल है, जो घणा दुःख री घड़ी मांय ई वां रा पिरवार वाळा रा अंग दान करण रो हिम्मत वाळो फ़ैसलो कीनो। वे कह्यो के प्रदेश मांय अंग दान करण रा बारा मांय जो चेतना जागी है, वां ऊं प्रदेश रो माथो ऊंचो व्हयो है। अंगदान सारू ऑनलाइन तरीका ऊं सौगंध लेवण रा मामला मांय राजस्थान देश मांय अव्वल है। कार्यक्रम मांय स्वास्थ्य विभाग री अतिरिक्त मुख्य सचिव शुभ्रा सिंह कह्यो के प्रदेश मांय अंगदान जनता रो अभियान बण ग्यो है। वे बतायो के लारला 6 महीना मांय प्रदेश मांय 6 कैंडेवर ट्रांसप्लांट व्हे चुक्या है, जदके लारला पूरा साल मांय 5 ट्रांसप्लांट व्ह्या हा। वे बतायो के काल नई दिल्ली मांय होवण वाळा एक जळसा मांय राजस्थान ने अंगदान सारू बेहतरीन आईईसी बाबत् नवाजो जावेला।

00000

भारतीय जनता पार्टी रा नुवा प्रदेश अध्यक्ष मदन राठौड़ काल शपथ लेवेला। ई सारू जयपुर मांय भाजपा रा प्रदेश कार्यालय रे बाहर जळसो राख्यो जावेला। शपथ लेवण रा जळसा री तैयारियां रो आज भाजपा री प्रदेश प्रभारी विजया राहटकर, विधानसभा मांय पैली वाळा विपख रा नेता राजेंद्र राठौड़, आला नेता नारायण पंचारिया अर पार्टी

रा पैली वाळा प्रदेश अध्यक्ष अरुण चतुर्वेदी समेत आला नेता जायजो लीनो ।

0000

.....
पेरिस ओलंपिक रा सातवां दिन आज भारत री तीरंदाजी टीम अंकिता भक्त अर धीरज बोम्मदेवरा स्पेन री इलिया केनालेस अर पावलो आच्छा री जोडी ने 5-3 ऊं हरा र मिक्सड टीम होड़ रो क्वार्टर फाइनल मुकाबलो जीत लीनो । निशानेबाजी मांय मनु भाकर महिलावां री 25 मीटर पिस्टल होड़ रा फाइनल मांय पूग गयी है । क्वालिफिकेशन राउंड मांय भाकर दूजी ठोड़ माथे रही । हॉकी मांय भारत ऑस्ट्रेलिया ने तीन-दो ऊं शिकस्त दीनी । भारत ओलम्पिक पुरुष हॉकी मांय 52 साल पाछे ऑस्ट्रेलिया रे खिलाफ जीत हासिल कीनी है । बैडमिंटन रा पुरुष सिंगल्स क्वार्टर फाइनल मांय आज भारत रा लक्ष्य सेन रो मुकाबलो चीनी-ताइपेई रा चाऊ-तियेन-चेन ऊं व्हेला । जूडो मांय 78 किलोग्राम ऊं ज्यादा भार वर्ग मांय तुलिका मान राउंड ऑफ 32 मांय हार र बाहर व्हे गयी । रोइंग मांय पुरुषां रा सिंगल्स स्कल्स मांय बलराज पंवार फाइनल डी मांय पांचवीं ठोड़ माथे रहया । एथलेटिक्स मांय रात साढे नौ बज्यां ऊं पारुल चौधरी महिलावां री पांच हजार मीटर क्वालीफिकेशन राउंड मांय अर मोड़ी रात शॉटपुट मांय तेजेंदर पाल सिंह तूर ई क्वालीफिकेशन राउंड मांय उतरेला ।

00000

बांसवाड़ा जिला रा छोटी सरवन हलका मांय नुवो बिजलीघर बणावण सारू ज़मीं लेवण सारू पूग्या प्रशासन रा अहलकारां अर गांव वाळा बीचे आज झगड़ो व्हे गयो । ई दौरान पुलिस रो एक कर्मचारी ज़ख्मी व्हे गयो, जिण रो जिला अस्पताल मांय ईलाज चाल रहयो है । हलका मांय पुलिस जाब्तो तैनात करी ज्यो है अर हालात काबू मांय है । गांव वाळा मुआवजो दियां पाछे ई और मुआवज़ा री मांग कर रहया है ।

0000